

## Dua rumah dilanda ribut di Kampung Pulau Jawa

- Oleh DIANA SURYA ABD WAHAB
- 7 Januari 2024, 2:58 pm



ANGGOTA bomba membuat pemantauan dan melihat kerosakan dialami kediaman dilanda ribut di Kampung Pulau Jawa di Pekan, Pahang. - FOTO IHSAN JBPM PAHANG

PEKAN: Dua keluarga berdepan detik cemas apabila kediaman mereka dilanda ribut sehingga mengalami kerosakan pada bahagian bumbung di Kampung Pulau Jawa di sini hari ini.

Pegawai Perhubungan Awam, Jabatan Penyelamat dan Bomba Malaysia (JBPM) Pahang, Zulfadli Zakaria berkata, kejadian kira-kira pukul 8.30 pagi itu tidak melibatkan sebarang kecederaan ataupun kemalangan jiwa.

“Hasil pemantauan awal mendapati kejadian hujan lebat serta angin kencang menyebabkan dua buah rumah mengalami kerosakan pada atap bahagian dapur dan ruang tamu.

“Kesemua penghuni sempat menyelamatkan diri dan berpindah ke rumah jiran dan saudara berhampiran,” katanya ketika dihubungi Utusan Malaysia di sini hari ini.

Mengulas lanjut, Zufadli berkata, apabila tiba di lokasi kejadian, pihak bomba turut menjalankan pemeriksaan di sekitar kawasan terbabit bagi memastikan tiada unsur bahaya yang lain.

“Menurut kedua-dua mangsa, dianggarkan kos kerosakan bernilai lebih kurang RM5,000 keseluruhannya.

“Hasil pemeriksaan terperinci dan pemantauan pihak bomba mendapati, kedua-dua kediaman tersebut masih boleh didiami dengan selamat.

“Namun begitu, kami turut memberi khidmat nasihat berkaitan keselamatan kebakaran terutama berkaitan pendawaian elektrik dan meminta mangsa menghubungi Balai Bomba dan Penyelamat (BBP) Peramu jika berlaku kecemasan,” katanya. – UTUSAN